

**ARLeF: spettacul su Sgorlon a Friuli Doc**

*La Agenzie Regjonâl pe Lenghe Furlane e torne a jessi presinte al event cul spettacul "Ombris tal Infinît", une produzion dal Teatro della Sete*

La ARLeF - Agenzie Regjonâl pe Lenghe Furlane, ancje intal 2021 e conferme di jessi une presince impuartante a Friuli Doc. In ocasion de edizion numar 27 de plui grande manifestazion enogastronomiche de Regjon, la Agenzie e sarà presinte cuntun spettacul par furlan di cualitât, ma no dome.

**Joibe ai 9 di Setembar, aes 21**, inte bieles suaze de **Cort di Palaç Morpurgo**, al larà in sene **"Ombris tal Infinît, leture seniche cun musiche e imagjins su la poetiche di Carlo Sgorlon"**, une produzion dal dut gnove dal Teatro della Sete finanziade de ARLeF. Il spettacul multimediâl al metarà dongje lis peraulis scritis di Sgorlon su la sô vite e su altris temis par lui impuartants, cun framents gjavâts fûr dal tierç romanç in lenghe furlane dal stes autôr, publicât postum intal 2020 de Societât Filologjiche Furlane. Di là de musiche dal vîf di Giorgio Parisi, che e compagnarà la leture afidade aes vôs di Caterina Di Fant, Michele Polo e Valentina Rivelli, a saran ancje lis ilustrazions che Serena Giacchetta e realzarà in direte. I dissens, proietâts in maniere di fâju gjoldi al public, a contribuiran a dâ dongje lis atmosferis, i personaçs e lis vicendis de narazion che Sgorlon al à esprimût cu la fuarce de sô marilenghe, par mostrâ la sensibilitât linguistiche di un grant autôr che al veve un amôr profont pe sô tiere. La narazion si instreçarà po dopo cu lis considerazions su la sô poetiche, graciis ai contribûts di Franco Fabbro e Marco D'Agostini, curadôrs dal libri "Carlo Sgorlon. Scrittore e intellettuale friulano", editât di Mimesis tal 2020.

A Friuli Doc però, come che al capite za di tantis edizions, in graciis dal servizi di traduzion metût a disposizion de ARLeF, a fevelaran furlan ancje tancj altris materiâi di comunicazion dal event.

*«Di cuasi trente agns – al à ricuardât il president de ARLeF, Eros Cisilino - Friuli Doc al è la vetrine plui impuartante dulà che a cjatin puest lis ecelencis dal teritori. No dome chês enogastronomiche, ma ancje chês culturâls, che la Agenzie e contribuîs a dâur valôr zontant iniziativis di cualitât, e in graciis dal ûs difondût de lenghe furlane intai materiâi a disposizion pal public. Une maniere in plui par mostrâ la ricjece dal Friûl: une tiere là che a convivin tantis animis e là che il plurilinguism al è il caratar distintîf e prezios».*

Graciis ae colaborazion cun PromoTurismoFVG, cun di plui, li dal Infopoint dal ent regjonâl, in Place Sant Jacum, si podaran ritirà materiâi informatîfs, ricevi indicazioni sui servizis de Agenzie e cognossi i tancj struments informatics che la ARLeF e met a disposizion par scrivi par furlan in maniere corete.

**INFORMAZIONS PE STAMPE - INFORMAZIONI PER LA STAMPA**

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Si à di ricuardâ infin che chest an la ARLeF e sarà ancje presinte cu la Fieste de Patrie dal Friûl (domenie ai 12 di Setembar), inmaneade dal Comun di Udin cu la poie de Regjon Friûl-Vignesie Julie e de Agjenzie, in colaborazion cul Istitût Ladin Furlan "Pre Checo Placerean".

### Schede dal spetacul:

#### OMBRIS TAL INFINÎT

**Une leture cun musiche e imagjins su la poetiche di Carlo Sgorlon.**

vôs che a recitin

Caterina Di Fant, Michele Polo, Valentina Rivelli

musiche dal vîf

Giorgio Parisi

dissens originâi

Serena Giacchetta

montaç digjitâl

Marco D'Agostini

studi e dramaturgjie

Marco D'Agostini, Caterina Di Fant, Serena Giacchetta, Valentina Rivelli

produzion

Teatro della Sete - Udin

Progjet finanziât di

ARLeF – Agjenzie Regjonâl pe Lenghe Furlane

Udin, ai 3 di Setembar dal 2021

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<